



Arartekoaren ebazpena, 2011ko abuztuaren 4koa. Horren bidez, Arabako Foru Aldundiaren Gizarte Zerbitzuen Sailari gomendatzen zaio eraginik gabe utz dezala forma akats larriengatik behar ez bezala eskuratutako kopuruak itzuli beharragatik sortutako zorra.

Aurrekariak

1. Erreklamaziogileak Etxebizitzako gastuetarako Prestazio Osagarri bat (EPO) jasotzen du. Prestazio hori 2010eko azaroaren 24ko ebazpenaren bidez eten zitzaion, eskatu zitzaionean alokairu ordainagiriak ez aurkezteagatik. Etetea atzera eraman zen urtarrilaren 1era, eta ondorioz behar ez zirela kobratutako zenbatekoengatik 2.460 euroko zorra sortu zen.
2. Erreklamaziogilearen kearen arrazoia da Arabako Foru Aldundiak ez ziola jakinarazi alokairu ordainagiriak San Antonio kaleko 10.eko Gizarte Prestazioei buruzko Informazio eta Izapidetze Udal Bulegoan aurkeztu behar zirela. Prestazioaren emate-ebazpena jakinarazteko idazkian adierazitako jarraibideei jarraituz, bere oinarrizko gizarte zerbitzura jo zuen aipatu agiriak ematera. Bertan, jakinarazi zitzaion izapidetzeko moduaren aldaketa bat zela-eta, ordainagiri horiek beste leku batean eman behar zirela eta garaiz jakinaraziko zitzaiola. Jakinarazpen horren ordez, azaroaren 24ko ebazpen idazkia jaso zuen; haren bidez prestazioa eten zitzaiola eta 2.460 euroko zorra sortu zela jakinarazi zitzaion.
3. Horri buruzko argibideak eskatu ondoren, Arabako Foru Aldundiak jakinarazi zigun halaxe izan zela, EPO emate-ebazpenaren jakinarazpenean gogorarazi zitzaiola erreklamaziogileari alokairu ordainagiriak oinarrizko gizarte zerbitzuetan eman behar zituela, ordura arte etxebizitza alokatzeko gastuak ordaintzeko GLL baten onuradun gisa egiten zuen bezalaxe.
4. Bestalde, aldundiari galdetu zitzaion ea espediente berririk zabaldu zuen behar ez zirela jasotakoak kobratzeko, etxebizitza prestazio osagarriaren 2/2010 Dekretuko IV. kapituluko artikulua betez, eta honakoa erantzun zigun: *"La Diputación Foral de Álava tal y como refrenda la normativa -artículo 33 del Decreto 2/2010 de 12 de enero de desarrollo de la prestación complementaria de Vivienda- realiza la correspondiente resolución de suspensión motivada. En la misma se notifica la deuda generada que asciende a 2.460€ por cobros indebidos y la forma de compensación de la misma".*



Gogoetak

1. Alokairu ordainagiriak emateko betebeharra 2/2010 Dekretuko 19.1 artikulua xedatzen du: *"Emate-ebazpenari dagokionez, Etxebizitzako Gastuetarako Prestazio Osagarriaren titularrak sei hilean behin ohiko etxebizitzaren edo bizitokiaren alokairu-gastuen frogagiriak udalerriko oinarrizko gizarte-zerbitzuari aurkeztu beharra ezarriko da. Frogagiri horiek ordainagiri pribatuak, fakturak, edo banku-ordainketako frogagiriak izan daitezke"*.

Alokairuen ordainagiriak, oinarrizko gizarte zerbitzuan eman beharrean, San Antonio kaleko bulegoan eman behar zirela ez zen behar bezala jakinarazi eta, beraz, Arabako Foru Aldundiak erabaki du erreklamaziogileak eteteko arrazoi bat bete duela (Dekretuko 24.1.a artikulua), ordainagiriak bai EPO emateko ebazpenean bai araudian bertan ezarritako xedapenen arabera aurkeztu arren. Hots, ordainagiriak oinarrizko gizarte zerbitzuan behar bezala aurkeztu arren, haiek ez ziren onartu esan baitzitzaion beste leku batean eman beharko zirela, eta leku hura garaiz kanpo jakinarazi zitzaion, eteteko prozedura amaitu ondoren.

Horrek, beste ondorio batzuen artean, entzuteko izapidea ez burutzea ere badakar, eta haren bidez erreklamaziogileak alokairuen ordainagiriak aurkeztu ahal zituzkeen, horrela etetea saihestuz.

2. Bestalde, 2/2010 Dekretuko IV. kapituluko xedapenak betetz behar ez zirela kobratzeagatik espediente berria zabaltzeko betetako izapideei buruzko argibide eskaerari erantzunez, zorra sortu izana etete ebazpen beraren bidez jakinarazi zitzaiola onartu da. Hots, behar ez zirela kobratutako zenbatekoen itzultzea eskatzeko prozedurarik hasi gabe, aipatu araudiak eskatzen duenez.

Beraz, uste dugu Herri Administrazioen Araubide Juridikoaren eta Administrazio Prozedura Erkidearen 30/92 Legeko 62.1.e artikulua aplikatu behar litzatekeela:

Horregatik guztiagatik, gomendio hau egiten dugu, otsailaren 27ko 3/1985 Legeak –erakunde hau sortu eta arautzekoak– 11 b) artikuluan ezarritakoaren arabera:

31/2011 GOMENDIOA, abuztuaren 4koa, Arabako Foru Aldundiaren Gizarte Zerbitzuen Sailari egina

Etxebizitza Prestazio Osagarria etenda egon den bitartean jaso ez duen zenbatekoa kobratzeko eskubidea onar diezaion.

Behar ez zirela jasotako zenbatekoak kobratzeak sortutako zorra baliorik gabe utz dezan eta Diru-sarrerak Bermatzeko Errentagatik jasotzen duen zenbatekotik kenduz ordainarazi zaion zenbatekoa itzul diezaion.